

La UBI ha il 2021 survegnì 30 reclamaziuns ord il public

L'onn passà ha l'Autoritad da recurs independenta davart radio e televisiun liquidà 37 recurs.

Tar 6 ha ella constatà ina violaziun dal cumond dad objectivitat. Per l'emprima giada è il cuntegn sin instagram stà object da recurrer.

GIUSEP CAPAUL/FMR

2021 ha l'Autoritad da recurs (AIRR) registrà 30 novas reclamaziuns, damain che durant il 2020 ch'è stà cun 43 in onn da record. Ils otg Posts da mediaziun, subordinads a la Autoritad da recurs, han registrà 2021 en tut 1200 reclamaziuns. 2,5 % dals cas tar ils Posts da mediaziun èn sa tschentads sco recurs tar l'Autoritad da recurs.

Pertutgadas be emissiuns da la SSR

La gronda part (18) dals recurs èn sa drizzads vers emissiuns televisivas e set giadas cunter contribuziuns radiofonicas. Igl ha sa tractà en tut da recurs cunter la Societad svizra da radio e televisiun (SSR). Temicamain èsi ì per il pli per mesiras statalas concernent corona – sco gia l'onn avant. Ulteriuramain hai era pertutgà auters temas actuals, politics ed economics. En il center è stà il cumond da rapportar objectivamain che protegia la libra furmaziun da l'opiniun tar il public. Dals 37 cas liquidads ha l'Autoritad da recurs constatà tar sis cas ina violaziun dal cumond dad esser objectiv.



Il rapport da l'Autoritad da recurs è publicgà en tuts quatter linguatgs nazionals.

FOTO MAD

Cumissiu extraparlamentara en uffizi accessoric

L'Autoritad da recurs exista dapi 1984 sco Cumissiu extraparlamentara da la Confederaziun. Ella consista da nov commembers en uffizi accessoric ed ha era in secretariat cun trais persunas. Presidiada vegn l'AIRR da la giurista e cussegladra da comunicaziun *Mascha Santschi Kallay*. La Rumantschia è represchentada tras il giurist *Armon Vital*, Scuol.

L'Autoritad ha da constatar – sin recurs inoltrà – sche bain publicaziuns da radio e televisiun da realisaders svizzers han violà redacziunalmain las determinaziuns prescrittas per il program. Medemamain ha l'AIRR da giuditgar, sch'igl è vegnì refusà cunter dretg a l'access al program u ad autras publicaziuns. Las tractativas da l'Autoritad èn publicas e gratuitas. Las decisius pon vegnir tratgas vinavant al Tribunal federal. Mintgamai sunter che l'Autoritad da recurs ha constatà ina violaziun dal dretg maina ella tras ina procedura per evitar mancanzas sumegliantas en l'avegnir.